

նը՝ էջմիածնի իշխանութիւնը ե՛ւ բովանդակ տաճկահաշութեան, ե՛ւ Երուսաղէմի պատրիարքութեան վրայ ապահովելու:

Ու Զուղայեցիին, նրանց օգնութեամբ, 30 քսակ<sup>1)</sup> դրամ ծախսելով, առնում է սուլթանից նոր հրովարտակ, որով էջմիածնի իրաւունքները, ըստ առաջնոյն, տարածւում էին ամբողջ տաճկահաշութեան վրայ եւս: Պոլսի եւ Երուսաղէմի պատրիարքական աթոռների վրայ էլ իր ուղած մարդկանց նստեցնելով, Յակովբ կաթողիկոսը վերադառնում է էջմիածին, Եղիազարի կաթողիկոսութիւնը թողնելով օգուտ կախուած, առանց աթոռի, առանց հողի: Բայց չմոռանանք իսկոյն աւելացնել, որ այս դէպքերից ընդամէնը միայն 3 տարի անցած, Երուսաղէմի պատրիարքի մահից յետոյ, Եղիազարը կաշառելով մեծ վէպիրին, պատրիարքական աթոռը նորից ձեռք ձգեց (1670) եւ նստեց Երուսաղէմում, պատրիարք ու կաթողիկոս անունով:

Ազմուկն ու խոտլութիւնը դրանով նորից սկսուեցին: Ինչպէս երեւում է՝ Երուսաղէմի պատրիարքութիւնը շա՛տ էր շահաւէտ: Չնայած հաշութիւնը դտնւում էր տնտեսական ծանր կացութեան մէջ, բայց եւ այնպէս չէր զլանում իր առատ նուէրներն ու օժանդակութիւնը Երուսաղէմի աթոռին: Ուստի շահամուղ ու բախտախնդիր հոգեւորականների մի խումբակ ամէն կերպ աշխատում էր իր ձեռքը ձգել այդ իւրոտ պատառը, կանդ չառնելով կաշառքի, զրպարտութեան, անգամ մատնութեան առջև:

Եւ տաճիկ եպարքոսներն ու կուսակալներն էլ շատ սիրով ընդ առաջ էին դնում նրանց այդ խայտառակ արարքներին, որովհետեւ մի կողմից՝ իրենց համար եկամտի մի առատ աղբիւր էր դա, իսկ միւս կողմից՝ մի գեղեցիկ միջոց առանց այն էլ պառակտուած ու քայքայուած հայ հասարակութիւնը աւելի թուլացնելու: Նրանք, այսօր, կաշառուելով մէկ սեւազլխից, նրան պաշտպանում եւ պատրիարքական աթոռը նրա՛ն էին շնորհում, որպէսզի վաղը, նրա հակառակորդից աւելի մեծ կաշառք եւ

մեծ հաւաստիացումներ ստանալով, նրան չընորհազուրկ անեն եւ նրա հակառակորդին պատրիարքական աթոռը բարձրացնեն: Մարդ ուղղակի զղուանքով է կարգում այդ պայքարի պատմութիւնը, որի հերոսներն էին Մարտիրոս վարդ. Կաֆացին իր արբանեակներով մի կողմից, իսկ միւս կողմից՝ Եղիազար Անթապցին իր համախոհներով<sup>1)</sup>:

Կարծէք դա քիչ էր, նոյն ժամանակներում աւելանում է մի նոր պայքար եւս պոլսահայ կեանքում — այս անգամ արդէն Կ. Պոլսի պատրիարքական աթոռի շուրջ: Գլխաւոր դերակատարները նորից նոյնն են՝ փառամուղ ու բախտախնդիր հոգեւորականները. պայքարի միջոցները՝ նոյնպէս — կաշառք, ամբաստանութիւն, մատնութիւն: Ու առանց այն էլ պառակտուած տաճկահաշութիւնը, մանաւանդ Պոլսում, նոր բանակների է բաժանւում՝ այս կամ այն հոգեւորականի շուրջը եւ սկսում պայքարել իրար դէմ:

Յակովբ Զուղայեցիին լսում է այդ ամէնը եւ անհունօրէն ցաւում:

Այլեւս ուրիշ ելք չկար օրէ ցօր աճող ազմուկն ու խոտլութիւնները դադարեցնելու համար: Մնում էր՝ նորից անձամբ ուղեւորուել Պոլիս: Եւ չնայած արդէն բոլորովին դառամեայ, 78 տարեկան ծերունի, բայց եւ այնպէս յանձն է առնում ճանապարհորդութեան բոլոր դժուարութիւնները, մանաւանդ որ — ինչպէս յետոյ կը տեսնենք — քաղաքական մի առաքելութիւն եւս անհրաժեշտ էր դարձնում նրա ուղեւորութիւնը դէպի արեւմուտք:

Պոլիս հասնելով 1679 թ. դեկտեմբերին եւ կամենալով խնդիրը լուծել ընտանեքար, անմիջապէս մի նամակ է գրում Երուսաղէմ, Եղիազարին, լաւ իմանալով, որ խոտլութեան գլխաւոր պատճառներից մէկը նա է: Նամակը կրում է Զուղայեցու քրիստոնէական լայն հոգու կնիքը եւ սկսում է այսպէս. «Սիրեցեալդ իմ, ի Քրիստոս պատուական եղբայր, հայեա՛ց եւ աղեխորով լե՛ր ի վերայ թշուառութեան մեքայոց, որք կան ի թագաւորական քաղաքիս, զի եւ դու մասամբ իւրք եղեր պատճառ ցաւոցս այսոցիկ. ե՛կ այսր եւ խորհուրդ արարեալ,

1) Քսակը 500 տաճկական դահ. կամ 110 Փրանկ է:

1) Չամչեան, Գ., Գլ. 12-1Թ.: